

TE POWHIRI MO PIHOPA ATARIA.

TE mutunga o te tikanga whakapuare i nga keeti, ka hui katoa te tangata ki te marae o Houngarea.

Kaore i roa ka puta mai te Pihopa o Waiapu, a Pihopa Ataria, me Atirikona Himikini. Ka tu mai te kapa wahine, me nga rau rakau i o ratou ringaringa, ka powhiritia te Pihopa Inia ki nga powhiri mo nga manuhiri tuarangi. E noho iho ana, e tu atu ana ko te kapa taane. Haruru ana te whenua, matakū ana te tangata. Ora mai ana nga tikanga rangatira o te rau tau tawhito.

Ka mutu ka tu mai a Mohi ki te mihi, ka pai te haere o nga korero a te morehu kaumatua ra. I muri tonu i ana mihi ka tukuna atu te pukapuka, he mea whakairo katoa nga taha, ko nga mihi enei kei roto i taua pukapuka:—

Kia Pihopa Ataria, LLD.

HAERE MAI! HAERE MAI! HAERE MAI!

Haere mai te manuhiri tuarangi.

Haere mai e te kotuku rerenga tahi.

Haere mai kua whakawhiti mai nei koe i te Moana-nui-a-Kiwa i hoe mai ai nga waka, o matou tupuna.

Tena koe, te uri o tatou tipuna i noho mai na i nga marae o Hawaiiki pamamao. Haere mai ki o whanaunga e noho atu nei i Aotearoa.

Kanui te koa mou ka eke nei ki tena taumata ikeike. Kua honoretia e koe nga iwi Maori i a koe ka tu nei hei Pihopa. Waiho ma muri e whai atu i muri i o tapuwae.

Haere mai ki to iwi Maori. Kua ngaro nga rangatira e tika ana hei powhiri i a koe.

Ko te morehu tenei. Rokohanga mai nei e koe te morehu kua ara te whare-karakia kohatu, ara kei te whai i nga tikanga e manaakitia nei e koe.

Haere mai, a, e hoki. E hoki ki o iwi, ki o hapu, i Tawhiti-nui, i Tawhiti roa, i Tawhiti pamamao, i Te Hono i wairua, nga marae tapu i nohia e o matau tipuna. Hoatu te aroha o te iwi Maori ki a ratou.

Kia ora tonu koe, a ma te Matua i te Rangi e tuku iho tana manaakitanga ki a koe, kia roa ai ou ra e hapai ana i nga tikanga e tipu ai te rangatiratanga o to tatou Ariki ki nga wahi katoa e haeretia ana e koe.

Ka mutu, ka haere atu a Mohi ka whakakakahu i te Pihopa i haere mai nei i Te Hono i Wairua, ki te kakahu o tatou tipuna, ara ki te korowai. I mau tonu hoki taua kakahu i a Pihopa Ataria a hoki noa.

Ka tu mai a Pihopa Ataria ki te whakahoki i nga mihi ki a ia. (Ko tona reo he reo pakeha.)